

Hungando ku Kandela

Tempu mi tata tabata mucha, el a gusta hunga ku lusafè. Un dia el a pega un kunuku ku yerba seku na kandela. Bientu a manda e kandela den direkshon di magasinu unda su tata a warda e kosecha i a kuida su bestianan. Di un òf otro manera, Dios a spar e magasinu. Ma e susto i sota ku el a haña a kur'é instantaneamente di e lokura di hunga ku lusafè. Mi tambe konosé un tata ku a siña su yu pa no hunga ku lusafè dor di kima dede di e yu.

Suponé ku mi a pensa, “Métodonan asina den nos era moderno ta antikuá, kruel i inhumano. Nos mester komprendé ku mucha ta gusta hunga ku kandela. Un mayor ku ta stima su yu, no mester prevení e di gosa. Pesei, mi ta kumpra hanskun p'é. Di e forma ei, e por hunga ku kandela kuantu ku e ke...protehá!” I mi ta konseh'é, “Baha man na hungamentu ku lusafè. Ma si bo ta skohe pa hasié tòg...ata hanskun aki.” I imaginá ku mi ta bisa, “Mi ta un mayor responsabel. Mi no ta kumpra lusafè p'é. Mi tin un stòk grandi di hanskun. Ma sigur no ta na mi lugá pa bis'é, ‘Stòp di hunga ku lusafè!’ E mester disidí pa su mes kiko e ta hasi. Si e ta kima kos di hende, e tin ku karga ku e konsekuensianan...” Bo lo bisámi ku mi kabes no ta bon!

Awendia AIDS ta un kandela feros ku ta kima fo'i kontrol. Médikonan ta yam'é un “pandemia”...un epidemia mundial. Mas ku 16 mion hende ya kaba a muri i por lo ménos 36 mion ta infektá. CNN a reportá ku na aña 1999 tabatin 5,6 mion kaso nobo di AIDS i 2,6 mion morto di e enfermedat. Mamanan a infektá mas ku 500.000 beibi durante e mesun aña. I AIDS a produsí 13 mion wérfano. E sífranan ta asina horroso i astronómiko ku kasi nos no por komprendé nan.

No ta pusíbel pa imaginá kuantu tristesa AIDS ta okashoná: kuantu lágrima, kuantu kurason kibrá, kuantu gastu, kuantu debe, kuantu desesperashon, kuantu doló, kuantu sufrimentu, kuantu entiero. No ta pusíbel pa tende tur wérfano chikitu yora pa nan mayornan defunto. No ta pusíbel pa eksperensia sintimentu di tur mama infektá ku ta pega nan beibi i mester a wak e kriatura pena kada dia te porfin mester der'é.

Ma e kos mas tristu tokante e infekshonnan i mortonan dor di AIDS ta ku **gran mayoria parti di nan ta totalmente innecesario!** Nan por a wòrdu prevení! Un porsentahe grandi a kontagiá e viro simpelmente dor di insistí pa gosa un aventura seksual ku un persona ku no ta nan kasá.

I e konseho duná den nos mundu di AIDS ta mes ridíkulo ku e konseho ami (a imaginá ku mi) a duna un yu ku ta gusta hunga ku lusafè. Unda t'esnan ku tin e wesu di lomba pa bisa na bos haltu, “Stòp di hunga ku kandela...stòp di tene relashon seksual fuera di matrimonio!”? Alkontrario, e rekomendashon absurdo i ilógiko ku nos ta propagá ta, “Si bo ke hunga ku kandela usa hanskun. Si bo ke tene relashon intimo, usa ‘pèchi’.”

Ta tempu pa nos lamta for di soño! Pa 20 aña nos a aseptá siegamente e mensahe ku “protekshon te solushon”. I durante e 20 aña ei, e kantidat di morto di AIDS ta oumentá ketu bai te surpasá 16 mion! (Hopi di nan tabata “protehá”!) Nos ta hoga, ma tòg ta insistí pa keda tene duru na un salbabida yen di buraku — kondon—mientras nos ta rechasá un salbabida sigur!

Ta pa nos bienestar nos Kreador a instruí, “...*apstené boso di inmoralidat seksual...*” (1 Tesalonisensenan 4:3). Sin duda dia lo yega ku nos lo haña nos obligá pa aseptá e úniko solushon pa AIDS...Dios Su solushon: **apstene di tur relashon seksual fuera di matrimonio.** E pregunta ta: kuantu hende mas tin ku muri promé ku nos lamta fo'i soño i aseptá **apstenshon komo e úniko solushon?** Kuantu tempu lo nos insistí pa djòdjò mientras nos ta hunga ku bida di hende? Kuantu tempu mas lo nos sigui hunga ku kandela...keriendo nos ta protehá?